

**HITZARMEN BEREZIA.** Euskaalgintzako elkarteentzat «larria da azken mementoan informazio zehatzik ez ukaitea»

# Ez da argi zein erabakigunek zehaztuko dituen lehentasunezko proiektuak

Euskal Konfederazioak mobilizatza deitu ditu euskaalgintzako elkarteak, bihar eguerdian, Baionako Herriko Etxean

Eneko Bidegain | BAIONA

Zein erabakigunek zehaztuko du eta nola hitzarmen bereziko diru laguntzak zein proiektutara joanen diren? Euskal Konfederazioak «nahasmendua» salatu zuen atzo, puntu horri buruz. Hitzarmenaren betetzeaz arduratuko den obren kudeaketa publikoaz «galdera larriak» daude dilindan, Mixel Oronos lehendakariaren hitzetan. Erabakigune horrek finkatuko du hizkuntza politika eta, beraz, hitzarmenaren jarraipena segurtatuko. Estatuko, departamenduko, eskualdeko eta euskal kulturaren aldeko herrien sindikatako ordezkari banak osatuko dute, ontsalaz, erabakigune hori.

«Funtsezko arazoa da ea nork finkatzen duen hizkuntza politika eta zeren arabera zehazten diren lehentasunak». «Hizkuntza kontseilua eta obren kudeaketa publikoa sortzen badira, lehentasunen finkatzeko gune

bat» izanen dela espero du Jakes Bortairuk, «premia larrienak» non diren eta «eragina duten neurriak» zein diren kontuan hartuko duena. «Espero dugu ez garela petatxuen politikara joanen, jakin gabe ea hori den beharrezkoena». Bortairuk Interneten euskara sartzeari buruzko programa zuen aipatu. Hitzarmen bereziko kultura atalak zati handi bat emanen die Donejakue bideei. Hori hizkuntza baino garrantzitsuago den galdetu zuen Mixel Oronosek.

Obren kudeaketak zein proiektu lagundu erabaki behar luke. Hitzarmen bereziko diruak zehaztuko direlarik ere, ez da argi diru hori guztia euskaalgintzara helduko den eta zein erakundek jasoko duen, proiektuak eta dosierak aurkeztu beharko baitira eta horien arabera erabakiko baita laguntzen banaketa. Helduen irakaskuntzari dagokionez, ez da ezinezkoa AEK-z aparteko erakunde batek proiektu baten aurkeztea. Ikasmaterialari dagokionez, ez da argi ea finkatuko den diru guztia Ikas-en proiektuentzat joanen den ala bertze elkarte batek ere laguntzak jasotzen ahalko dituen.

Duda horiei gehitzen zaie euskaalgintzako elkarteek «azken memento arte ez informaziozirik ez ukatea». «Informazio kontrajarriek» kezkatzen dituzte. «Espero dugu ez dela 1997ko CIADTan bezalako Eguberriko oparia izanen». Naroa Gorostiagak, Euskal Irratiak sareko zuzendariak, 1997an ministroek ez zutela euskararentzat laguntzarik finkatu oroitarazi zuen.

## Mobilizaziorako deia

Euskal Konfederazioak elkarretaratze «sinbolikora» deitu du bihar eguerdirako. Euskaalgintzako elkarteetako langile eta laguntzaileek Baionako Herriko Etxe aitzinean dute hitzordua. Ordezkaritza bat Jean Grenet auzapezarekin bilduko da. Akitaniako kontseilari gisa, mozio bat emanen diote heldu den astearteko bilkuran irakur dezan, Euskal Konfederazioaren eskaerak aipatuz. Euskal kulturaren aldeko herrien arteko sindikatuko lehendakari gisa sostengua erakutsiko diote, hark dirua ematen baitu.

**NAROA GOROSTIAGA**

«Espero dugu hitzarmen berezia ez dela 1997an CIADTek egin zigun Eguberriko oparia bezalakoa izanen»

**MIXEL ORONOS**

«Hitzarmenaren betetzeaz arduratuko den obren kudeaketa publikoaz galdera larriak daude dilindan»

**JAKES BORTAIRU**

«Funtsezko arazoa da ea nork finkatzen duen hizkuntza politika eta zeren arabera zehazten diren lehentasunak»



Naroa Gorostiaga, Mixel Oronos eta Jakes Bortairu, Euskal Konfederazioko kideak, atzoko agerraldian.

## BAZTERTUAK

### «Gezurrezko aitzakiak»

Euskal Konfederazioari ez zaizkio zuzenak iduritzen suprefetak baztertu ekimenei buruz eman argibideak.

**IRAKASKUNTZA.** Suprefetak dio zati hori Hezkuntza Nazionalarekin negoziatzen dela. Euskal Konfederazioak erantzun dio «gauzak orokortasunean» aurkeztu behar direla.

**SEINALEAK.** Suprefetak Euskal Konfederazioari adierazi zion seinale elebidunak ezartzeari ez dela «funtsezkoa».

**ZERBITZU PUBLIKOA.** Zerbitzu publikoan euskararen sartzeko konstituzioa aldatu behar litzateke, suprefetaren erranetan. «Aitzakia» eta «gezurra» da, Euskal Konfederazioaren ustez. Orain arteko legeek ematen omen dute euskara sartzeko aukera. «Borondate politiko murrizta» salatu dute.

## Garapen Kontseiluak argitasunak eskatu dizkio Baionako suprefetari

E.B. | BAIONA

Jean-Claude Iriart Garapen Kontseiluko lehendakariak gutuna igorri zion Baionako suprefetari, joan den astean. Zenbait argitasun galdegin zizkion hitzarmen bereziaren hizkuntza atalaz. Euskal Irratiek beren zalantzen eta kezken berri eman zuten, eta Garapen Kontseiluari gutuna igorri. Hiru euskal irratiei zuzendua izanen litzatekeen laguntzari buruz, urtean 720.000 libera (18,2 milioi pezeta) eskatuak direlarik, laguntza berriak 280.000 libera direla ohartarazi zuen Iriarten gutunak. Helduen irakaskuntzaren atalaz ere dudak argitzea eskatu zuen.

«Bi operazio horiek ez badute erantzun egokirik lortzen hitzarmen bereziaren partetik, ezin ulertze zuzen eta azkarra eraginen lukete. Badakit zer garrantzia ematen diozun hizkuntza atalari. Zinez espero dut bi operazio horientzako azken diru zuzenketak erronken arabera izanen direla. Botere publikoen presentzia eskasa zuten eremuetan elkarteek duela urte andana bat abiatu ekimenak laguntzea dute helburu bi operazio horiek».

Iriartek ikasmaterialaren zatia ere aipatu zion suprefetari. «Zehazgabetasun guztiak kentzeko, Ikas zentro pedagogikoen eta Dokumentazio peda-

gogikoaren eskualde zentroaren (CRDP) arteko partzuegoa argiki azaldua» izatera aholkatu zuen. «Garapen Kontseiluak Ikas zentro pedagogikoa xutik ezartzeko gogoeta garrantzitsu bat lagundu zuen. CRDP aktiboki busti zen, eta horrek hobekuntza lagundu baizik ez dezake egin».

Jean-Claude Iriarten ustez, hitzarmen bereziak hitzarmenetik kanpo gelditu diren bertze ekintzen «obratzeko era» zehaztu behar du, eta «bereziki ama eskolatik unibertsitaterainoko euskararen irakaskuntzaren garapen estrategia». Sail horretan Hezkuntza Nazionalak parte hartu behar duela gogatu zuen.